

Al-Sultan Abdullah titah kajian terperinci atasi banjir di Pahang

ROSILAWATI ROSEDI 11 November 2024 06:16pm Masa membaca: 2 minit



Al-Sultan Abdullah dan Tengku Hassanal berkenan menyerahkan sumbangan kepada mangsa banjir di Dewan Orang Kampung Tok Machang pada Isnin.

RAUB - Sultan Pahang, Al-Sultan Abdullah Ri'ayatuddin Al-Mustafa Billah Shah bertitah supaya kajian terperinci dapat dilakukan oleh pihak berkaitan untuk mengatasi masalah banjir di negeri itu.

Titahnya, antara usaha yang boleh dilakukan ialah mendalamkan sungai-sungai di perkampungan yang terlibat dengan banjir.

"Usaha ini diharap dapat mengurangkan kesan daripada banjir khususnya kawasan di tepi sungai.

"Kita perlu usahakan dengan cara kita untuk terus kaji dan kalau tidak kita akan berada dalam keadaan ini buat selama-lamanya," titah baginda.

Baginda bertitah demikian ketika berangkat bercemar duli melawat dan menyampaikan sumbangan kepada mangsa banjir di pusat pemindahan sementara (PPS) di Dewan Orang Ramai Kampung Tok Machang di sini pada Isnin.

Turut berangkat, Tengku Mahkota Pahang, Tengku Hassanal Ibrahim Alam Shah.

Titahnya lagi, pihak yang berkaitan juga diharap dapat membina rumah lebih tinggi untuk mereka yang tinggal di tepi sungai dan berisiko banjir.

"Ini fenomena yang biasa di Pahang iaitu mereka yang tinggal di tepi sungai berdepan risiko sebegini.

"Namun saya berharap kalau ada kesampaian, rezeki, bantuan daripada pihak kerajaan dan swasta kalau bina rumah biarla ditinggikan sikit," titahnya.

Dalam pada itu, Al-Sultan Abdullah juga meminta petugas terlibat dapat menjalankan tugas membantu mangsa sebaik mungkin.

"Nasihat saya supaya petugas bertugas dengan amanah, ikhlas membantus ketika menyediakan tempat, makanan keselesaan yang baik untuk mangsa.

"Saya juga harap mangsa pun tidak minta berlebihan..terima yang disediakan dan tidak cepat melenting," titah baginda yang juga berharap tiada banjir besar berlaku di Pahang.

Mengulas keadaan banjir di Lipis, baginda akan melihat keadaan terkini di daerah itu.

"Saya tidak tahu lumpur atau air sebab saya tidak tengok sendiri, tengok esok macam mana kalau keadaan bertambah teruk saya akan ke sana," titahnya.



Saweah bersama anaknya, Nor Rabiatal Abdul Razak yang berpindah ke PPS di Dewan Orang Ramai Kampung Tok Machang sejak Ahad.

Sementara itu, bagi Saweah@Noraziah Musnih,56 dari Kampung Tok Machang memberitahu, rumahnya dinaiki air kira-kira jam 4.30 pagi selepas hujan beberapa jam sebelum itu.

"Kami segera selamatkan dokumen penting dan segera berpindah ke PPS demi keselamatan keluarga.

"Keadaan air sudah surut tapi risau jika keadaan hujan lebat berlaku lagi," katanya banjir itu merupakan kejadian kali pertama pada tahun ini.

Berdasarkan portal Info Bencana sehingga jam 4.53 petang, seramai 223 mangsa membabitkan 65 keluarga ditempatkan di enam PPS di daerah Raub yang dilanda banjir pada Ahad.

Di Lipis pula, seramai 230 mangsa melibatkan 64 keluarga berpindah ke dua PPS yang dibuka pada Isnin.